

ADDENDA DE MODIFICACIÓN DO CONVENIO DE COLABORACIÓN ENTRE A CONSELLERÍA DO MAR E A UNIVERSIDADE DE A CORUÑA PARA O ESTUDO DA MELLORA DO CRECEMENTO DE ESPECIES DE ACUICULTURA-BIOROCK.

Dunha parte, Dona Marta Villaverde Acuña, Conselleira do Mar, nomeada polo Decreto 35/2025, de 4 de xuño, publicado no Diario Oficial de Galicia núm. 106 de 5 de xuño de 2025, en virtude das facultades recoñecidas polo artigo 34 da Lei 1/1983, de 22 de febreiro, de normas reguladoras da Xunta y da súa presidencia.

E doutra parte, Don Ricardo Cao Abad, en representación da Universidade da Coruña, como o seu reitor, en uso das atribucións que lle confire o art. 36 1.F) dos Estatutos desta universidade, aprobados por Decreto 101/2004, do 13 de maio, da Xunta de Galicia (DOG do 26 de maio) e modificados por Decreto 194/2007 do 11 de outubro (DOG do 11 de outubro).

Cada parte intervén en función do seu cargo, no exercicio das facultades que para convir en nome das entidades que representan teñen conferidas, recoñecéndose mutua e respectiva competencia e capacidade suficiente para formalizar o presente convenio de colaboración.

EXPOÑEN

PRIMEIRO. Que a Lei 14/2011, de 1 de xuño, da Ciencia, a Tecnoloxía e a Innovación establece un marco de referencia para promover a colaboración entre os axentes públicos e privados do Sistema Español de Ciencia, Tecnoloxía e Innovación, co fin de dar unha resposta eficaz as esixencias do cambio tecnolóxico e de desenvolvemento económico sostible, de maneira que, de acordo co artigo 34.1 da citada Lei, prevese a posibilidade de celebrar convenios de colaboración suxeitos ao dereito administrativo, ben os propios axentes públicos entre si, ou estes con axentes privados que realicen actividades de investigación científica e técnica, xa sexan nacionais, supranacionais ou estranxeiros, co fin de realizar conxuntamente diferentes actuacións como, entre outros, proxectos e actuacións de investigación científica, desenvolvemento ou innovación.

SEGUNDO. A Estratexia de Especialización Intelixente (RIS3) de Galicia 2021-2027 define o marco das políticas de investigación e innovación na Comunidade Autónoma para este período. Como instrumento de planificación operativa para a súa implementación entre 2025



e 2027, a Xunta de Galicia desenvolveu o Plan galego de investigación e innovación 2025-2027.

Este convenio enmárcase dentro da RIS3 de Galicia 2021-2027, aliándose co reto 1 (modelo de xestión de recursos naturais e culturais baseados na innovación) e coa prioridade 1 (sostibilidade). Así mesmo, contribúe ao obxectivo estratéxico 1, integrándose no programa Integra da RIS3 e no programa Coñecemento do Plan galego de investigación e innovación 2025-2027.

TERCEIRO. Que á Dirección Xeral de Pesca, Acuicultura e Innovación Tecnolóxica da Consellería do Mar correspóndelle exercer, entre outras, as funcións de dirección e coordinación das competencias e funcións en materia de ordenación pesqueira en augas interiores e acuicultura, segundo o disposto no Decreto 50/2021, do 11 de marzo, polo que se aproba a estrutura orgánica da Consellería do Mar (DOG nº 58, do 26 de marzo), e polo presente convenio quere dar apoio ás actividades de investigación para o estudo da mellora do crecemento de especies de acuicultura.

CUARTO. A Universidade de A Coruña (en adiante, UDC) como institución de servizo público, está aberta á sociedade e ten, como outros, como fins prioritarios, fomentar a investigación e difundir a cultura no seo da sociedade. Para a mellor cumprimento dos seus fins, a UDC manterá relacións con centros de investigacións e con institucións culturais e sociais, e impulsará a celebración de convenios de investigación con entidades e organismos públicos e privados, así como de contratos para a realización de traballos de carácter científico, técnico ou artístico.

QUINTO. As rías galegas enfróntanse ao reto de dar solucións a problemas como os derivados dun entorno cambiante que afecta á súa estabilidade, e que se atopa ameazada por diversos factores como a competencia con especies invasoras, o cambio climático global ou a contaminación. Ante tales ameazas, cómpre en experimentar nunha tecnoloxía que favoreza a fixación e o desenvolvemento de diferentes especies de moluscos, e que permitan solventar as perdas de produtividade.

A UDC comezou unha colaboración coas entidades Global Coral Reef Alliance (GCRA) e a empresa española Blue Regeneration SL. (BR) para aplicar unha tecnoloxía específica á



acuicultura galega, tecnoloxía que podería mellorar as taxas de crecemento e resiliencia do mexillón. Deste xeito, a Consellería do Mar, a través do presente convenio, quere estudar métodos sostibles para aumentar o asentamento, a supervivencia e o crecemento do mexillón, en concreto, estudar o efecto potencial de tecnoloxía específica no aumento da produtividade da acuicultura do mexillón en Galicia.

SEXTO. Con data do 24.04.2025 asínase o Convenio de Colaboración entre a Consellería do Mar e a Universidade de A Coruña para o estudo da mellora do crecemento de especies de acuicultura-Biorock,

SÉTIMA. A Comisión de Seguimento, establecida na cláusula sexta do convenio, reúnese o 23.06.2025. Por parte dos representantes de Universidade da Coruña, sinálase que o período para a execución do proxecto estaba estimado en seis meses, pero dada a demora na sinatura do convenio o tempo para a súa execución quedou reducido afectando, ademais da propia investigación, a partidas como a da contratación do persoal que non se vai poder levar a cabo polo prazo previsto, sendo imprescindible para o apoio na investigación.

O Subdirector Xeral de Acuicultura manifesta que, efectivamente, a tramitación para a sinatura do convenio coa Universidade da Coruña prolongouse máis do previsto por motivos internos da propia tramitación, o que pode supoñer un inconveniente para a correcta execución dos traballos previstos para o estudo da mellora do crecemento de especies de acuicultura -Biorock.

Unha vez informado este punto, a Comisión acorda tramitar a Addenda de modificación do Convenio de colaboración entre a Xunta de Galicia e a Universidade da Coruña para o estudo da mellora do crecemento de especies de acuicultura -Biorock, para ampliar o prazo de xustificación e finalización do convenio nas seguintes datas:

- Cláusula cuarta. Duración da actividade.

A duración do convenio estenderase ata o 15/12/2025.

Cláusula décima. Períodos de execución e xustificación

-Período de realización de gastos e pagos: Dende a sinatura ao 31/10/2025

-Data límite de presentación documentación xustificativa: 30/11/2025



De conformidade ao exposto, a Comisión de Seguimento acordou modificar o convenio nestes termos, así que, as partes acordan a subscrición da presente Addenda ao devandito convenio, de acordo coas seguintes:

CLÁUSULAS

Primeira.- Obxecto

O obxecto da presente Addenda do Convenio de Colaboración entre a Consellería do Mar e a Universidade de A Coruña para o estudo da mellora do crecemento de especies de acuicultura-Biorock, é modificar a cláusula cuarta e décima para ampliar os prazos de duración, execución e xustificación do convenio.

Segunda.- Modificación da cláusula cuarta.

A cláusula cuarta "Duración do convenio", queda coa seguinte redacción:

Este convenio entrará en vigor tras a súa sinatura por todas as partes, e a súa duración estenderase ata o 15/12/2025, podendo ampliarse de mutuo acordo se as investigacións e desenvolvementos non produciran o froito esperado e as partes consideran oportuna a súa ampliación. Neste caso, e con anterioridade á finalización do convenio, subscribirán unha prórroga para o efecto, consonte ao establecido na cláusula duodécima.

Terceira.- Modificación da cláusula décima

A cláusula décima "Prazos de execución e xustificación", queda coa seguinte redacción:

Tanto a memoria de actividade científico-técnica do punto 1, como a memoria económica coa xustificación dos gastos incorridos no período de xustificación do punto 2, presentaranse dentro dos seguintes prazos:



| | |
|--|--|
| | ANO 2025 |
| Período de realización de gastos e pagos | Dende data de sinatura a 31/10/2025 |
| Data límite presentación documentación xustificativa | 30/11/2025 |

Previo ao aboamento que corresponda, certificarase polo responsable do proxecto que os traballos realizados se axustan ao previsto no presente convenio.

Cuarta.-

En todo o non nomeado expresamente pola presente Addenda, seguirá en vigor o disposto no Convenio.

En proba de conformidade, asinan por duplicado o presente documento

A Conselleira do Mar
Marta Villaverde Acuña

O Reitor da UDC
Ricardo Cao Abad

